


Pa celebra 30 aña di existencia di Scol di Baile Simadanza

Falta poco pa e show “Simplemente Simadanza” tuma luga na Cas di Cultura



ORANJESTAD - Durante e fin di siman aki e alumnonan di Scol di Baile Simadanza lo presenta un show cu nan a prepara durante varios luna pa conmemora e trinta aña di existencia di Simadanza.

E esfuerzonan di e alumnonan: chikito, hoben y adulto bou guia di nan docentenan Astrid Salazar y Ina Profet sin duda lo conta cu un apoyo di e publico amante di baile.

E prome presentacion lo ta diahuebs 30 di november pa 8 'or di anochi y dianan 1 y 2 di december lo tin dos otro funcion tambe pa 8 'or di anochi den Cas di Cultura.

E alumnonan lo presenta ballet clasico, bailenan di folklore y folklore contemporaneo, jazz y street dance.

E musica escogi pa e bailenan ta varia di Mozart te na Izaline Calister. Un grupo di hoben lo balia un Mazurka riba musica di caha di orgel di Choncho Boekhoudt den un coreografia hopi special.

Lo no falta un bon Tumba tambe presenta pa nos hobennan cu ta haya les di baile pa entre otro aprecia nos folklore.

Lo tin tambe presentacion di e baile di tur hoben, esta street dance, cu un coreografia di Annemarie Verblackt. Un otro grupo di hoben lo presenta e baile di street dance cu coreografia di Tracy Pietersz, ex-alumno di Simadanza kende recientemente a gradua como docente di baile na Rotterdam.

Durante su trinta aña di existencia, Simadanza a conoce hopi alumno, hoben y adulto, masculino y femenino y diferente ta sigui les di baile ainda sea pa diversion of pa mehora nan habilidad di baile, specialmente pa parehanan tin e oportunidad pa sera conoci cu e forman nobo di balia Salsa, Merengue y naturalmente locual ta di nos propio folklore, esta Tumba, Wals, Mazurka y Danza.

Pa e fin di siman aki e celebracion di trinta aña di Scol di Baile Simadanza ta den Cas di Cultura y carchi ta obtenibel na Simadanza den Dakota Shopping Paradise, Lucor Jewelry, Plaza Bookshop, oficina di UNOCA, La Deseada na San Nicolas y cerca alumnonan di Simadanza.

